



BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
GRAD SARAJEVO
OPĆINA CENTAR SARAJEVO
OPĆINSKI NAČELNIK

BRADA: Služby. 2. 11. 11
kontrola,
sigurnost:

**PRAVILNIK
O KRITERIJIMA I RASPODJELE NOVČANIH SREDSTAVA ZA
SUFINANSIRANJE TROŠKOVA VANTJELESNE OPLODNJE I JEDNOKRATNU
NOVČANU POMOĆ ZA ROĐENJE DJETETA**

Mart, 2024.godine

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH " broj 49/06 i 51/09), člana 25. Statuta Općine Centar Sarajevo –prečišćeni tekst («Službene novine Kantona Sarajevo», broj 23/04) i člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo" broj: 38/14- Prečišćeni tekst, 38/16, 44/17,28/18, 52/21 i 40/22), Općinski načelnik donosi

PRAVILNIK
O KRITERIJIMA I RASPODJELE NOVČANIH SREDSTAVA ZA SUFINANSIRANJE TROŠKOVA VANTJELESNE OPLODNJE I JEDNOKRATNU NOVČANU POMOĆ ZA ROĐENJE DJETETA

Član 1.
(Predmet)

Ovim Pravilnikom o kriterijima i raspodjeli novčanih sredstava za sufinansiranje troškova vantjelesne oplodnje i jednokratnu novčanu pomoć za rođenje djeteta (u daljem tekstu: Pravilnik) utvrđuju se uvjeti i način ostvarivanja prava na sufinansiranje troškova vantjelesne oplodnje, prava na jednokratnu novčanu pomoć za rođenje djeteta i prava na jednokratnu novčanu pomoć za očeve koji koriste pravo na porodijsko odsustvo.

Član 2.
(Cilj)

Cilj lokalne zajednice je da kroz djelovanje u sistemu socijalne zaštite izdvajanjem budžetskih sredstava stvori bolje uvjete za porodični život i pronatalitetnu politiku.

Član 3.
(Nadležnost)

Poslove u vezi ostvarivanja prava propisanih ovim Pravilnikom obavlja općinska služba nadležna za poslove socijalne zaštite.

Član 4.
(Javni poziv)

- (1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće budžetske godine ili do utroška planiranih budžetskih sredstava.
- (2) Jednokratna pomoć utvrđena ovim Pravilnikom dodjeljivat će se na osnovu podnesenih zahtjeva, a u skladu sa objavljenim javnim pozivom.
- (3) Zahtjevi za ostvarivanje prava podnose se službi nadležnoj za poslove socijalne zaštite putem protokola Općine.
- (4) Zahtjevi će se rješavati po redoslijedu podnošenja.
- (5) Služba je dužna u roku od 30 dana odnosno maksimalno 60 dana od dana podnošenja riješiti zahtjev i o tome obavijestiti podnosioca.
- (6) Dokumentacija koju je potrebno priložiti uz zahtjev po objavljenom javnom pozivu biti će navedena u posebnom obrascu koji će biti dostupan na web stranici i info-pultu Općine Centar Sarajevo.

Član 5.
(Uvjeti za sufinansiranje vantjelesne oplodnje)

Uvjeti za ostvarivanje prava na jednokratnu novčanu pomoć za sufinansiranje troškova vantjelesne oplodnje na osnovu ovog Pravilnika su :

- a) Da je podnosilac zahtjeva u bračnoj zajednici prije početka postupka vantjelesne oplodnje ili u vanbračnoj zajednici u trajanju od najmanje tri godine prije početka postupka vantjelesne oplodnje;
- b) Da je prebivalište jednog od bračnih/vanbračnih drugova na području općine Centar Sarajevo najmanje godinu dana prije podnošenja zahtjeva za ostvarivanje prava;
- c) Da ima preporuku zdravstvene ustanove koja se bavi medicinski potpomognutom oplodnjom;
- d) Da žena nije navršila 42 godine života;
- e) Da postupak vantjelesne oplodnje za koji se traži sufinansiranje nije okončan;
- f) Da bračni/vanbračni par koji podnosi zahtjev za ostvarivanje prava na sufinansiranje postupka vantjelesne oplodnje ne može ostvariti /nije ostvario pravo na finansiranje/sufinansiranje istog putem Zavoda zdravstvenog osiguranja i reosiguranja Federacije Bosne i Hercegovine.

Član 6.
**(Visina jednokratne novčane pomoći
za sufinansiranje troškova vantjelesne oplodnje)**

Pravo na jednokratnu novčanu pomoć za sufinansiranje troškova vantjelesne oplodnje može ostvariti podnosilac zahtjeva koji ispunjava kriterije iz člana 5. ovog Pravilnika za pet pokušaja, na način da će Općina zdravstvenim ustanovama sufinansirati troškove postupka vantjelesne oplodnje u maksimalnom iznosu do 1.000,00 KM za prvi pokušaj, a za ostala četiri pokušaja u maksimalnom iznosu do 1.500,00 KM.

Član 7.
(Izuzetak za sufinansiranje troškova vantjelesne oplodnje)

Izuzetno od odredaba člana 5. tačka d). i člana 6. ovog Pravilnika, pravo na jednokratnu novčanu pomoć za sufinansiranje troškova vantjelesne oplodnje može ostvariti:

- a) Žena koja nije ostvarila uspješnu trudnoću, na način da će Općina sufinansirati troškove šestog i sedmog postupka vantjelesne oplodnje u maksimalnom iznosu do 2.500 KM i
- b) Žena starija od 42 godine za dva pokušaja u iznosu od 50 % od ukupne cijene troškova postupka, odnosno maksimalnom iznosu do 2.500,00 KM po pokušaju.

Član 8.
(Jednokratna novčana pomoć za rođenje djeteta)

Uvjeti za ostvarivanje prava na jednokratnu novčanu pomoć za rođenje djeteta na osnovu ovog Pravilnika su:

- a) Da porodilja ili otac djeteta imaju najmanje godinu dana prebivališta na području općine Centar Sarajevo;
- b) Ukoliko jedan od roditelja nema prebivalište na području općine Centar Sarajevo da pravo na jednokratnu novčanu pomoć za rođenje djeteta nije ostvario na području općine svog prebivališta;
- c) Da je zahtjev za ostvarivanje prava podnesen u roku od 60 dana od dana rođenja djeteta.

Član 9.
(Visina jednokratne novčane pomoći za rođenje djeteta)

(1) Porodilja ili otac djeteta, pod uvjetima utvrđenim ovim Pravilnikom, ima pravo na jednokratnu novčanu pomoć u sljedećim iznosima:

- a) za prvo dijete u iznosu od 200,00 KM;
- b) za drugo dijete u iznosu od 300,00 KM;
- c) za treće i svako naredno dijete u iznosu od 400,00 KM i
- d) za blizance u iznosu od 500 KM.

(2) U slučaju mrtvorodenčeta ili slučaju da dijete umre u roku od 60 dana od dana rođenja, porodilji ili ocu djeteta pripada pravo na jednokratnu novčanu pomoć u iznosu od 500,00 KM.

Član 10.
(Odlučivanje po zahtjevu
za sufinansiranje troškova vantjelesne oplodnje)

- (1) Nakon provedenog postupka po zahtjevu za ostvarivanje prava na sufinansiranje troškova vantjelesne oplodnje, nadležna služba će Općinskom načelniku uputiti prijedlog za sufinansiranje postupka.
- (2) Općinski načelnik će Zaključkom odlučiti o priznavanju prava na sufinansiranje postupka vantjelesne oplodnje za svakog podnosioca.
- (3) Ukoliko se utvrdi da nisu ispunjeni uvjeti za ostvarivanje prava na sufinansiranje troškova vantjelesne oplodnje u skladu sa odredbama ovog Pravilnika, podnosilac zahtjeva će o tome biti obaviješten aktom nadležne službe.

Član 11.
(Odlučivanje po zahtjevu za jednokratnu novčanu pomoć za rođenje djeteta)

- (1) Nakon provedenog postupka po zahtjevu za ostvarivanje prava na jednokratnu novčanu pomoć za rođenje djeteta nadležna služba upućuje prijedlog za dodjelu jednokratne novčane pomoći za rođenje djeteta Općinskom načelniku.
- (2) Općinski načelnik će Zaključkom odlučiti o priznavanju prava na jednokratnu novčanu pomoć za rođenje djeteta.
- (3) Ukoliko se utvrdi da nisu ispunjeni uvjeti za ostvarivanje prava na jednokratnu novčanu pomoć za rođenje djeteta u skladu sa odredbama ovog Pravilnika, podnosilac zahtjeva će o tome biti obaviješten aktom nadležne službe.

Član 12.
(Isplata novčanih sredstava)

- (1) Korisnicima koji ostvare pravo na sufinansiranje troškova vantjelesne oplodnje uplata sredstava izvršit će se putem nadležne službe a na osnovu predračuna troškova postupka vantjelesne oplodnje na račun jedne od zdravstvenih ustanova koje provede postupak na teritoriji Bosne i Hercegovine.
- (2) Ukoliko se postupak provodi u zdravstvenoj ustanovi koja se nalazi van teritorije Bosne i Hercegovine, uplata sredstava će se vršiti putem nadležne službe na osnovu predračuna troškova vantjelesne oplodnje te zdravstvene ustanove, na račun korisnika prava.
- (3) Pravdanje isplaćenih sredstava vršit će se po okončanom postupku ovjerenom kopijom fiskalnog računa ili odgovarajućim dokazom da je postupak vantjelesne oplodnje za koji su sufinansirana sredstva okončan, istekom roka od 60 dana po okončanom postupku, a najkasnije do kraja tekuće budžetske godine u kojoj je ostvareno pravo.
- (4) Korisnici koji ne budu u naprijed utvrđenom roku opravdali dodijeljena sredstva ista će biti u obavezi vratiti na račun Općine Centar Sarajevo najkasnije u roku koji će biti utvrđen posebnim aktom, u suprotnom će se sredstva potraživati putem nadležnog suda.
- (5) Ukoliko zdravstvena ustanova namjenski ne iskoristi sredstva uplaćena od strane Općine za sufinansiranje troškova vantjelesne oplodnje ista je dužna vratiti na transakcijski račun Općine do kraja budžetske godine u kojoj su sredstva izdvojena.
- (6) Jednokratna novčana pomoć za rođenje djeteta dodjeljivat će se isplatom na tekući račun podnosioca zahtjeva putem nadležne službe.

Član 13.
(Izuzetak od Pravilnika)

- (1) Izuzetno od odredaba ovog Pravilnika, očevi sa prebivalištem na području općine Centar Sarajevo koji koriste porodiljsko odsustvo, imaju pravo na jednokratnu novčanu pomoć u iznosu od 200,00 KM.
- (2) Rok za podnošenje zahtjeva za ostvarivanje prava iz stava (1) ovog člana je 60 dana od dana otvaranja porodiljskog odsustva od strane oca djeteta.
- (3) Nakon provedenog postupka, nadležna služba za poslove socijalne zaštite dostavlja prijedlog za dodjelu jednokratne novčane pomoći Općinskom načelniku, koji nakon razmatranja istog donosi Zaključak.
- (4) Uplata sredstava izvršit će se putem nadležne službe na tekući račun podnosioca zahtjeva.

Član 14.
(Stupanje na snagu Pravilnika)

Ovaj Pravilnik stupa na snagu narednog dana od dana objavljanja na Oglasnoj ploči Općine Centar Sarajevo, a isti će biti objavljen i u Službenim novinama Kantona Sarajevo i web stranici Općine Centar Sarajevo.

Član 15.
(Prestanak)

Stupanjem na snagu ovog Pravilnika prestaje da važi Pravilnik o kriterijima i raspodjeli novčanih sredstava za sufinansiranje troškova vantjelesne oplodnje i za jednokratne novčane pomoći porodiljama („Službene novine Kantona Sarajevo“ broj 11/21).

Broj: 09/B-11-1350/24
Sarajevo: 19.03. 2024. godine.



OPĆINSKI NAČELNIK
Srdan Mandić
Srdan Mandić

Napomena:

Pravilnik je objavljen na oglasnoj ploči Općine Centar Sarajevo dana 19-03-2024 2024.godine

Meliana

OBRAZLOŽENJE

PRAVNI OSNOV

Pravni osnov za donošenje Pravilnika o kriterijima i raspodjeli novčanih sredstava za sufinansiranje troškova vantjelesne oplodnje i jednokratnu novčanu pomoć za rođenje djeteta sadržan je:

- u članu 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", broj 49/06 i 51/09), kojim je uređeno da općinski načelnik donosi akte iz svoje nadležnosti;
- u članu 69. Statuta Općine Centar Sarajevo - prečišćeni tekst ("Službene novine Kantona Sarajevo", broj 23/04) kojim je propisano da općinski načelnik donosi, između ostalog, pravilnike;
- u odredbi člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo" broj: 38/14- Prečišćeni tekst, 38/16, 44/17, 28/18, 52/21 i 40/22) kojim je propisano da se iz općinskog budžeta finansiraju druga prava iz socijalne zaštite, koja svojim propisom utvrđuju općine.

RAZLOZI DONOŠENJA

Razlozi donošenja novog Pravilnika o kriterijima i raspodjeli novčanih sredstava za sufinansiranje troškova vantjelesne oplodnje i jednokratnu novčanu pomoć za rođenje djeteta jesu sljedeći:

- U cilju ravnopravnosti roditeljske brige dosadašnje pravo na jednokratnu novčanu pomoć porodiljama preimenovano je u pravo na jednokratnu novčanu pomoć za rođenje djeteta;
- Izmjenom i dopunom Zakona o liječenju neplodnosti biomedicinski pomognutom oplodnjom („Službene novine FBiH“ broj 44/22) i donošenjem Pravilnika o opsegu prava na biomedicinski pomognutu oplodnju iz sredstava proračuna Federacije Bosne i Hercegovine, način formiranja cijene pojedinačnih postupaka biomedicinski pomognute oplodnje, kriteriji i način ugovaranja, kao i druga pitanja od značaja za provođenje biomedicinski pomognute oplodnje („Službene novine FBiH“ broj 4/23) čija je implementacija počela krajem 2023. godine, a čemu je prethodilo stavljanje van snage do tada važeće Odluke Zavoda zdravstvenog osiguranja Kantona Sarajevo na koju se nadovezivao i raniji Pravilnik, ukazala se potreba za izmjenom načina ostvarivanja prava na sufinansiranje troškova postupka vantjelesne oplodnje;
- Uvedeno je novo pravo na jednokratnu novčanu pomoć za očeve koji koriste porodiljsko odsustvo;
- U cilju ravnopravnosti roditeljske brige omogućeno je da pravo na jednokratnu novčanu pomoć za rođenje djeteta ostvare kako majke tako i očevi;
- Prilikom provođenja postupka ostvarivanja prava na jednokratnu novčanu pomoć za rođenje djeteta uočeno je da bi bilo efikasnije da se nakon okončanja postupka donosi odluka za dodjelu pomoći po pojedinačnom zahtjevu a ne da se, kako je do sada bilo, na kraju mjeseca isplata vrši na osnovu spiskova.

OBRAZLOŽENJE

Član 1. – predmet Pravilnika;

Član 2.- definiše cilj koji se želi postići Pravilnikom;

Član 3.-normira nadležnost za postupanje po odredbama Pravilnika;

Član 4.- propisuje obavezu objave javnog poziva;

Član 5. –definiše uvjete za ostvarivanje prava na sufinansiranje troškova vantjelesne oplodnje;

Član 6. – definiše visinu prava na sufinansiranje troškova vantjelesne oplodnje;

Član 7. – propisuje izuzetak od člana 5 točka d).i 6. Pravilnika;

Član 8. –definiše uvjete za ostvarivanje prava na jednokratnu novčanu pomoć za rođenje djeteta;

Član 9. – normira visinu jednokratne novčane pomoći za rođenje djeteta;

Član 10.- definiše način odlučivanja o pravu na novčanu pomoć za sufinansiranje troškova vantjelesne oplodnje;

Član 11. – definiše način odlučivanja o pravu na jednokratnu novčanu pomoć za rođenje djeteta;

Član 12.- propisuje način isplate prava utvrđenih ovim Pravilnikom;

Član 13.- normira izuzetak od Pravilnika;

Član 14.-definiše vrijeme stupanja na snagu Pravilnika ;
Član 15.-normira prestanak važenja ranije Pravilnika.

FINANSIJSKA SREDSTVA

Finansijska sredstva za ovu namjenu obezbijeđena su u Budžetu Općine Centar Sarajevo.

